

INUIT ATAQATIGIIT

Inatsisartuni



12. marts 2019.

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

- 1. KILLILIISA-mut tunngatillugu aningaasaliissutit 3,8 mio. kr. iluini meeqqanik inuusuttunillu kinguaassiutitigut kannguttaatsuliorfigineqarsimasut suliniuteqarfiginissaannut aningaasat qanoq annertutigisut atorineqarniarpat? Qanoq atorineqassanersut tunngavilersorneqarsinnaappat?**
- 2. Meeqqanik inuusuttunillu kinguaassiutitigut atornerluinerit akiorneqarnissaat siunertaralugu KILLILIISA-mut aningaasaliissutit 3,8 mio. kr. qaffanneqarnissaannut Naalakkersuisut pilersaaruteqarpat?**
- 3. Meeqqanut inuusuttunullu kinguaassiutitigut kannguttaatsuliorfigineqarsimasunut katsorsaasartut angalaaqatigiittartut amerlineqarnissaannut Naalakkersuisut pilersaaruteqarpat?**
 - a) Meeqqanut inuusuttunullu kinguaassiutitigut kannguttaatsuliorfineqarsimasunut katsorsaasartut angalaaqatigiittartut amerlineqassappata aningaasannorlugu qanoq naleqassava?**
- 4. MIO tusagassiutitigut nalunaaruteqarpoq¹: “MIO-mit nalunnilarput kisitsisaatigineqanngitsorpassuusut meeqqat kinguaassiutimikkut atornerlunneqartut pineqartillugit. Kisitsisaatigineqanngitsut paasissagutsigik aamma isumaqarpunga piffissanngortoq meeqqanut upalungaarsimasunik pilersitsinissaq aamma eqqarsaatigineqalertariaqartoq, meeqqat ikioqqullutik saaffiginnikkaangata”.**
 - a) Ullutsinni meeqqat ikioqqullutik saaffiginnikkaangata Nuna tamakkerlugu upalungaarsimasoqarnermi pissutsit qanoq inissisimanersut Naalakkersuisut nassuiaateqarfigisinnaavaat?**
 - b) Meeqqat ikioqqullutik saaffiginnikkaangata Nuna tamakkerlugu upalungaarsimasartussanik pilersitsinissamut Naalakkersuisut pilersaaruteqarpat?**
- 5. Meeqqat inuusuttullu kinguaassiutimikkut kannguttaatsuliorfigineqarsimasut pilertornerusumik katsorsarneqartalernissaat siunertaralugu Naalakkersuisut qanoq anguniagaqarpat?**

¹ <https://sermitsiaq.ag/kl/meeqqat-illersuisuat-meeqqanut-angalaaqatigiittartunik-kissaateqartoq>

6. Inoqarfinni avinngarusimanerusuni inissisimasuni meeqqat inuusuttullu kinguaassiutimikkut kannguttaatsuliorfigineqarsimasut suliniuteqarfiginissaanut Naalakkersuisut qanoq iliuseqarniarpat?
7. Meeqqanut inuusuttunullu kinguaassiutimikkut kannguttaatsuliorfigineqarsimasunut ilaqutariit ataatsimoortillugit qaangiiniarnissaat ikorfartorneqarnissaallu qanoq qulakkeerniarneqarnersoq Naalakkersuisut nassuiaateqarsinnaappat?
8. Meeqqanik inuusuttunillu kinguaassiutitigut kannguttaatsuliorsimasut katsorsarneqartarnerat qanoq ingerlanneqartarpa?
 - a) Meeqqanik inuusuttunillu kinguaassiutitigut kannguttaatsuliorsimasut katsorsarneqartarnerat pitsanngorsarniarlugu Naalakkersuisut qanoq pilersaaruteqarpat? Pitsanngorsaasoqassappat aningaasannorglugu qanoq naleqassava?
9. Ulluinnarni meeqqanut inuusuttunullu qanimut sullissisut meeqqerivinni, atuarfeqarfinni, Peqqissaavinni, ilinniartoqarfinnilu sulisut piginnaasaasa kinguaassiutitigut kanngutsaattuliortarneq pillugu ilisimasaasa qaffassaaviginissaannut Naalakkersuisut pilersaaruteqarpat?
10. Meeqqanik inuusuttunillu kinguaassiutitigut atonerluisoqarsimatillugu ilisimasaqarnermi pasittaasaqarnermilu paqumiginnittarnerup akiorneqarnissaanut Naalakkersuisut qanoq iliuseqarniarpat?
11. Sammisamut tunngatillugu allanik pingaarutilinnik Naalakkersuisut ilisimatitsissuteqarsinnaappat?

(Inatsisartuni ilaasortaq Aqqa Samuelsen, Inuit Ataqtigiit)

Tunngavilersuut:

Meeqqanik inuusuttunillu kinguaassiutitigut kannguttaatsuliornerit politiit nalunaarutaani qaffariarsimasut takuneqarsinnaapput. Kisitsisillu qaffariarsimanerat soorunalimi ilungersunarpog amiilaarnarlunilu. Meeqqat inuusuttullu kinguaassiutimikkut atonerlunneqarsimasut pilertornerusumik utaqqisinneqarujussuaqqaaratillu katsorsarneqartarnissaat pinngitsoorneqarsinnaangilaq. Taamaattumik KILLILIISA-mut aningaasaliissutit qaffanniarneqarnersut paasisaqarfigerusuppakka.

Inoqarfinni avinngarusimanerusuni inissisimasuni meeqqat inuusuttuaqqallu kinguaassiutimikkut kannguttaatsuliorfigineqarsimasut qanimut tikinneqarlutik katsorsarneqartarnissaat pingaaruteqarpoq. Inoqarfiinni avinngarusimasuni inissisimasuni meeqqat inuusuttullu kinguaassiutimikkut kannguttaatsuliorfigineqarsimasut Naalakkersuisut tungaanniit qanoq suliniuteqarfiginiarneqarnersut paasisaqarfigissallugu soqutiginarpoq. Meeqqat inuusuttullu sumi najugaqaralarunilluunniit najugarisaq qimanngikkaluarlugu ajornanngippallu ilaqqat najuinnarlugit katsorsarneqartarnissaat qulakkeerneqartariaqarpoq. Taamattumik meeqqanut

inuusuttunullu kinguaassiutimikkut kannguttaatsuliorfigineqarsimasunut katsorsaasartut angalaaqatigiittartut amerlineqarnissaannut Naalakkersuisut pilersaaruteqarnersut paasisaqarfigerusuppara, pilertornerusumik katsorsaasoqartarnissaa pingaaruteqarmat.

Aamma meeqqanut inuusuttunullu kannguttaatsuliorsimasunut pineqaatissiisarnerup sukaternissaa Naalakkersuisut naalagaaffimmut saaffiginnissutigisimaneeraat erseqqissumik tunngavilersorluakkamillu paasisaqarfigerusuppara. ?

Inuiaqatigiittut susassareqatigiinnerput nukittorsarniarutsigu meeqqanik inuusuttunillu kinguaassiutitigut atonerluisoqarsimatillugu ilisimasaqarnermi pasitsaassaqarnermilu paqumiginnittarnerup akiornissaanut pilersaaruteqartoqartariaqarpoq. Tamakkuuppullu Naalakkersuisut tungaanniit erseqqinnerusumik paasisaqarfigerusutakka, meeqqat, inuusuttut, ilaqutariillu kinguaassiutitigut atonerluisoqartarnerata kingunerisaanik misigisaqarnerlussimasut eqqarsaatigalugit.